


Noticia
Transparente
di Gobierno

ISLA ONLINE

Diahuebs 18 Juli 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



STABILIDAD
Y
PROSPERIDAD
2 0 2 4



Gabinete Wever-Croes



PROME MINISTER

Evelyn Wever-Croes

Gobierno no por interveni of revoca e decisionnan di companianan estatal pero

GOBIERNO A PIDI ARUBUS PA RECONSIDERA E NOMBRAMENTO DI E DIRECTOR NOBO

Despues di informacionnan cu a wordo duna durante e Conferencia di Prensa di Gobierno di Aruba Dialuna 15 di juli, miembronan di prensa a haya oportunidad pa haci pregunta na Prome Minister Evelyn Wever-Croes. E mandatario a duna su contesta riba un pregunta basta interesante cu a trata e nombramento di señor Nuboer como e director nobo di Arubus.

Basa riba e pregunta aki, Prome Minister a indica cu e nombramento di señor Nuboer ta causa controversia. E situacion cu Arubus ta aden awor ta delicado y mester un director di un reputacion y integridad intachabel pa lidera e compania. Tanto internamente pa haya e respet di e empleadonan y externamente unda tur stakeholder mester atende cu e compania pa soluciona problemanan y pa e motibonan ey Gobierno a pidi Arubus reconsidera e nombramento aki.

Prome Minister ta splica cu Arubus ta un compania estatal y ta tuma decisionnan riba su mes a base di e reglanan di "Corporate Governance". Gobierno no por interveni of revoca e decision pero si por duna opinion y por comparti preocupacionnan riba e nombramento.

"Nos Gobierno desde cu mi a bira minister encarga cu integridad na aña 2017, a haci integridad un punto di atencion y tambe mi a pone hopi prioridad na dj'e. No por ta asina cu nos Gobierno tin un maneho di integridad y un compania estatal ta haci lo contrario. Manera mi a menciona anteriormente, Gobierno no por tuma e decision of cambia e decision di Arubus pero si nos por pidi pa reconsidera e nombramento, y esey ta loke nos a haci", Prome Minister a declara.





Condecoracion Real Aruba 2025



Con pa propone un persona ?

**Por haci proposicion door
di yena dos formulario.**

E formulario aki ta obtenibel durante oranan
di oficina na balie di Bestuurskantoor na

O'stad y San Nicolas y tur MFA.

Tambe por download e formularionan for di
e website di gobierno: **www.gobierno.aw**

www.overheid.aw

www.government.aw

Ta ricibi peticionnan
pa aña **2025**

entrante dia

6 di mei 2024

E ultimo dia pa
entrega peticionnan
ta dia

31 di juli 2024

(4:00pm)

PA MAS INFORMACION POR YAMA OF MANDA E-MAIL:

Sra. I. Niclaas-Ras tel: 592-2232 | Sra. R. Garrido tel: 593-1820 | condeco.aruba@gmail.com



TUR ESFUERSO TA DIRIGI PA POR ENTREGA PRESUPUESTO 2025 NA TEMPO NA PARLAMENTO DI ARUBA

CAFT a duna conseho caba y awo Raad van Advies ta na turno pa brinda su conseho



CAFT

Conforme e Ley di LAFT, ya caba e colegio di supervision financiero CAFT a duna su conseho na Minister di Finansa riba e presupuesto preliminar pa aña 2025. CAFT den su conseho ta hopi positivo y ta indica, entre otro, di ta satisfecho di mira cu tur documentacion ta entrega na tempo, cu e presupuesto ta bon hinca den otro, cu e resultado financiero ta un surplus di mas di 1% y cu e debe di Aruba ta bahando.

Raad van Advies

Na e momento aki, Presupuesto 2025 ta na Raad van Advies pa su conseho. Asina cu Raad keda cla cu nan conseho, Gobierno lo haci e cambionan necesario y lo brinda e concepto di Presupuesto 2025 na Parlamento.

Proceso cu falta pa yega na Presupuesto 2025

Tur esfuerzo ta wordo haci pa por entrega e concepto di Presupuesto 2025 na tempo, prome di 1 di september, na Parlamento di Aruba, manera a bin ta pasa cu Presupuestonan di añanan 2023 y 2024.

Presupuesto di Pais Aruba ta e ley di mas importante cu Parlamento di Aruba ta trata cada aña. E preparacion pa hinca Presupuesto di Pais Aruba den otro, ta cuminsa ya caba den luna di april di e aña anterior. Na e momentonan aki tur esfuerzo ta dirigi pa por entrega e Presupuesto di Pais Aruba pa aña 2025 na tempo, prome cu dia 1 di september 2024 na Parlamento di Aruba. Minister Maduro di Finansa ta informa cu Presupuesto 2025 ta casi cla y awo ta den e proceso di haya su consehonan di CAFT y di Raad van Advies. CAFT a duna conseho caba y awo Raad van Advies ta na turno pa brinda su conseho.

Si tur cos cana bon, e debate publico den Parlamento lo por tuma lugar den e ultimo lunanan di aña 2024 y e Presupuesto 2025 lo por keda aproba fin di december 2024. Despues cu Gobernador firma e Presupuesto 2025, esaki lo wordo publica den Landscourant pa asina por drenta na vigor na comienso di aña 2025.



PROYECTO DI RENOBACION DI E VLOER NA CENTRO DEPORTIVO LIBERTADOR BETICO CROES (SPORTHAL) NA SANTA CRUZ A INICIA

Diamars mainta, Minister di Enseñansa y Deporte Endy Croes a acudi na Centro Deportivo Libertador Betico Croes na Santa Cruz. A inicia cu un proyecto di renovacion na Centro Deportivo Libertador Betico Croes na Santa Cruz. Manera ta conoci, e vloer di e sporthal tabata den un condicion deplorabel. Durante pandemia Centro Deportivo Libertador Betico Croes a wordo uza como centro di vacunacion y a acorda cu Gobierno di Aruba lo percura pa renovacion di e vloer. Pues pa hopi tempo no por a uza e sporthal pa eventonan deportivo.

E container cu tur material a yega Aruba, pues e trabounan a inicia. A kibra e vloer di e sporthal completamente pa pone un cancha special y moderno. Minister Endy Croes ta gradici Gobierno di Aruba, Ministerio di Deporte, directiva di Aruba Sport Unie (ASU), Dienst Openbare Werken (DOW), Arubaanse Wegenbouw Maatschappij (AWM) y tur stakeholder cu ta haciendo e proyecto aki posibel. Finalmente, e mandatario di Deporte a indica cu mas despues e lo bishita e sporthal pa mira e avancen y lo mantene pueblo informa acerca di e ultimo desaroyonan di renovacion.



DELEGACION DI COMITE OLIMPICO ARUBANO A BIAHA NA FRANCIA PA REPRESENTA ARUBA DEN WEGANAN OLIMPICO PARIS 2024

**A haci entrega oficial di e uniform na Prome Minister Evelyn Wever-Croes y
Minister Endy Croes**



E delegacion di Comité Olímpico Arubano (COA) a biaha na Francia pa participa den Weganan Olímpico Paris 2024 cu lo tuma luga dia 26 di juli 2024 pa 11 di augustus 2024. Diaranson ultimo, secretaria general di COA y vice-presidente di Comité Olímpico Internacional Sra. Nicole Hoevertsz, hefe di Mision Paris 2024 Sra. Kamilah Dammers y miembro di Direccion di Deporte di COA Sr. Jonathan Wever a bishita Minister di Enseñansa y Deporte Endy Croes hunto y Minister President Evelyn Wever-Croes pa haci entrega di e uniform cu e seis (6) atletanan lo bisti pa representa Aruba durante Weganan Olímpico Paris 2024.

E diseñonan di e uniform ta representa nos fauna y e color blauw riba e uniform ta representa nos lama. Banda di esaki, e costurero Sr. Ramon di Staylay a confecciona e trahe oficial pa apertura di e ceremonia di Weganan Olímpico Paris 2024. Pa prome biaha e apertura di Weganan Olímpico e delegacionnan lo ta riba un boto cu lo traspasa mas di 6 km riba e riu de Seine cu ta recore den e ciudad. Ta premira cu mas di 300 mil persona lo ta presente pa mira e gran desfile di Weganan Olímpico Paris 2024.

Minister Endy Croes ta gradici Comité Olímpico Arubano pa e bunita obsekio aki. Alabes ta desea Shanayah Howell, Chloe Farro, Ethan Westera, Just van Aanholt, Mikel Schreuders y Philip Elhage hopi exito durante Weganan Olímpico Paris 2024. Aruba ta hopi orguyoso di boso. Cu disciplina, deseo, dedicacion y determinacion ta logra. ■■■





Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD